



Juventus-i coach Igor Tudor
mapa nungi anentsüogo

Tir Javier Milei-i Argentina midterm
elections nung takok tulu angu

VOL. XXIII ISSUE NO. 21 (ADOK 21) DIMAPUR SANGTENNÜ (TUESDAY) MONGPUTENI (OCTOBER) 28, 2025 ₹ 5.00

Yimkhiung nunger shishilembar dang tax meshiba noktanger

Dimapur, October 27, 2025 (TYO): Naga National Political Group(s) shinga nem-a Yimkhiung telongtet nung Yimkhiung nunger businessman/ entrepreneurs dang tax memeshidaksütsü ta Yimkhiung

Tribe nung Federal Council-i bangjemtepogo. Iba tetuyuba ya tang nungi mapa akümer aser local entrepreneurs ajungmesotsü aser ajungkettsü atema iba lemtet agi ta Federal Council-i metetdaksü.

'National Red Run' atema traffic tetuyuba agütsür

Dimapur, October 27, 2025 (TYO): October 3, 2025 nü Agri Expo 4th Mile nungi C.T Square Chümoukedima tashi 'National Red Run 3.0' agitsü aliba atema traffic diversion/ restrictions agütsüogo.

Iba sentong ya Nagaland State AIDS Control Society (NSACS)-i Nagaland Olympic Association (NOA) aser Nagaland Athletics Association (NAA) den yaritepa ayongzüker.

Agri Expo 4th Mile nungi 7th mill Junction tashi RHS stretch nung gari mesenzükdaksütsü. NH 29nung iba stretch ya ROAD RACE runners aser event management atema mekazüka yutsütsü aser iba tsütsü feeder/approach roads ajak shibangtsü ta Commissioner of Police, Dimapur Aotula T Imchen, IPS-i sangdong ka nung ashi.

NH 29 (opposite lane) nung LHS nung

Chümoukedima tsütsü aser Dimapur tsütsü aoba garitem atema two Lane ama amshitsü aser iba stretch nung overtaking noktanger ta CP Dimapur-i ashi.

Iba stretch nung maximum speed limit ji 30 KM/hour alitsü aser stopping & parking memelar. Agri Expo Junction nungi 7th mile Junction tashi highway anatsülemn garitem anena ayutsü memelar ta sangdong nungsa metetdaksüogo.

3rd Mile Junction nungi Patkai Junction tashi school bus aser emergency service vehicle dak alaka gari tulutem Entry/Exit memelatsü. Item tenokdangba ya October 30, 2025 anepdang 4:00 ako nungi 7:00 ako tashi alitsü ta Aotula-isa metetdaksü.

Iba dak sendakba osang metetpelanürtemi 7085055039 (Traffic Control Chumoukedima) den tongteptsü akok ta laisa shisem.

NFHRCC-i Foothills Road teka- raba nung renemtsü nenshir

Dimapur, October 27, 2025 (TYO): October 25, 2025 nü Nagaland Foothills Road Coordination Committee (NFHRCC) senden amendang December 2025 tashi nung mapa tembangtsü aliba mapatem mapang shitak nung inyaksü ajungmesotsü telemetba agiogo.

NPWD, R&B-i yaküm work orders 17 agütsüba Contractor tem dang state sorkar den contract work order sign sütepa aliba mapang shitak nung mapa tembangtsü nenshitsu ayongzüker ta NFHRCC-i metetdaksü.

Bangdak Department 2 lane Foothills Road Construction nung tanüngba shilem atema 2nd Phase SASCI Loan Scheme indang DPR renemtsü nenshir ta The Media Cell NFHRCC-i sangdong ka nung ashi.

State sorkari Centre den National Highway Status atema

mapa dang nungi tamasa 2 lane foothills road construction ajunga renemtsü takhangba agütsütsü senden nungsa lemtetogo ta parnoki ashi.

Tanüngba mapatem ateam bangdak Department-i Open Tender System ajanga jaoktsüla aser contractor company shia nem parnok merits nung ajemdaker 10-15 kms dang mapa lemozütsütsü nenshir ta NFHRCC-isa telemetba agiba metetdaksüogo.

Iba ya Young Qualified Naga Entrepreneurs yaritsü aser ajungmesotsü atema lir ta parnoki shisem.

Nagaland Foothills Road construction tejakleni bener aotsü atema Committee-i November 2022 nungi Nagaland Chief Minister den ajuruteptsü mepishia arur anungji pai tekaratiba nung Committee den ajuruteptsü atema mapang agütsütsü ayongzüker ta NFHRCC-isa metetdaksüogo.



October 26, 2025 nü JBC, Conference Hall, Christian Institute of Health Sciences & Research (CIHSR) nung Blessed Bonding indang 2 buba Foundation Day mungogo. Iba sentong nung Alisha Foundation ajanga teyari agütsü aser "Finding Strength in the struggle, Speaking in the silence" omen nung ajemdaker amung. Blessed Bonding ya Intellectual and Developmental Disabilities (IDD) aketba tanur tsüraburtemi tentetba NGO ka lir. October 26, 2025 nü JBC, Conference Hall, Christian Institute of Health Sciences & Research (CIHSR) nung Blessed Bonding indang 2 buba Foundation Day mungogo. Iba sentong nung Alisha Foundation ajanga teyari agütsü aser "Finding Strength in the struggle, Speaking in the silence" omen nung ajemdaker amung. Blessed Bonding ya Intellectual and Developmental Disabilities (IDD) aketba tanur tsüraburtemi tentetba NGO ka lir.

NMA-i Union Minister Rajnath Singh dangi shidi ka zülü

Dimapur, October 27, 2025 (TYO): Naga Mothers' Association (NMA)-i Nagaland Governor ajanga Union Minister for Defence Rajnath Singh dangi shidi ka zülüogo aser iba nung Myanmar kübok Khenmoi Naga yimtsüng nung drone agi bomb amshia amakdang nisung ana tepsetba khukhua aitsüogo.

Arrtsü adena orr Naga Self Administred Zone nung arishi küm 7 tanur ozü jala Eli Phiphot Wangsa aser ozü jabaso Eno Khampei Wangsa (27) na tepsetba den civilian aika yirutsüba aitsür. Khampei Wangsa ya Khammoi Students Union nung

Joint Secretary liasü ta NMA-i shidi nung shia lir.

Indian Army-i civilians aser tanurtem amakba nung tashishitsü keta lir aser iba ya International Human Rights Conventions anema lir. Anungji civilian dak drone bombings asüba atema bushisüngdang asütsü aser ozü Naga nunger anema iba mapa inyaktertem merenshitsu akhanger ta NMA-i Rajnath Singh dang shiogo.

Indian Army-i Tiru mining area kübok Oting nung civilian tem tepsetba atema tang tashi temeten mangu lir ta parnokisa nenshi. Naga nunger tesemtem ya

Indian Army indang 'killing fields' mesüdaksütsü aser ibala mapa atema parnok aitsütsüla. Ozü tanurtem tepsetba atema temeten meshir aser mozü kidang anepalurtem, civilian rongsen aser kiojentem akoksaba atema teyari agütsütsü akhanger ta NMA-isa metetdaksü.

Naga nunger tesem ajak nung yimjung alitsüla aser tang yimjung maparen ya kümzüka ayutsüla. International Human Rights ajanga lateta aliba ama onoki yimjung aser lendong nungi jenbua alitsü temeten meraksatsüla ta NMA-isa Rajnath Singh dang shiogo.

Niuland nung tebu den tanur 2 tepset

Dimapur, October 27, 2025 (TYO): Niuland district kübok Hakhizhe yimtsüng nung Hombarnep züngia lendong tulu ka atalokogo aser iba ya tanur ana den tebu tepsetba lir.

Tanep 2:00 ako meta Hakhizhe nung Abdul Gofur (40)-i pa tenu Ashatul (35) aser tenu'er tanur ana tepset. Tanur ana ya ka arishi küm 12 tain jala aser arishi küm 6 tain jabaso liasü ta osang angazüker.

Abdul Gofur ya Assam kübok

Morigaon nungi lir aser pai nisung asem tepsetba sülen tanep 4:00 ako meta Hakhizhe village council tsüngdang pa sasa bendanga agütsü. Iba mapang pai nisung tepsetdang amshiba hadirtem dena bener oa agütsü ta osang angazüker.

Iba osang angazükba sülen Niuland district ketdangsürtem den Nagaland police nungi forensic team ka tesem tonga oa bushisüngdang tenzüko aser tasümangtem District Hospital

Dimapur morgue nung post mortem agitsü atema bener ogo.

Abdul Gofur-i kechi atema nisung asem tepset'ar ano memetet saka Hakhizhe village council-i ashiba agi pai ganja achir. Abdul'er kinungertemia pai ganja achiba kuli agütsüogo.

Abdul ya taküm küm tetenzüklen Hakhizhe yimtsüngi aru aser anogo ishika tejakdang pai pa kinungtsü aser tanurtem kidang nungi meindok ta par kinunger kati ashi.

Tanü nungi SIR tanabuba shilem tenzüker

New Delhi, October 27, 2025 (Agencies): Chief Election Commissioner (CEC) Gyanesh Kumar-i Hombarne State aser Union Territory 12 nung electoral rolls indang Special Intensive Revision (SIR) shilem tanabuba agitsü osang metetdaksüogo.

Mongulbar nungi Andaman and Nicobar Islands, Goa, Puducherry, Chhattisgarh, Gujarat, Kerala, Madhya Pradesh, Uttar Pradesh, Rajasthan, West Bengal, Tamil Nadu, aser Lakshadweep nung SIR tenzüksü ta CEC Gyanesh-i

ashi.

Bihar nung SIR mezüngbuba shilem takok ngua agiba sülen iba lemtet agi. Bihar nung polling booths 90,000 tema nung "zero appeals" melii iba mapa inyakogo ya ta paisa ashi.

State 12 nung taonung ayaterm nungi voter lists ajak sota ayutsü aser iba sülen Booth Level Officers (BLOs)-i door-to-door verification tenzüksü. Kilen shiai tang aliba voter details dener Unique Enumeration Form ka angutsü aser iba nung parnoki jangjashiba mesüra melenshiba

mapatem inyaksü ta CEC-isa metetdaksüogo.

Vote enoktsürtemi voters.eci.gov.in nung 2002-2004 SIR records repringtsü akok aser voter ka tenüng mesüra par tsürabur tenüng 2003 rolls nung lira kulikaket talila menüngdaksü ta paisa ashi.

"Mongulbar nungi polling ketdangsürtemi atema training tenzüksü. BLOs-i asemben tashi kilen shia semdangtsü aser migrated voters-i online ajanga form agütsütsü akok" ta Gyanesh Kumar-isa metetdaksü.

IDIA-i Shamator nung awareness sentong ayongzük



Dimapur, Mongputeni/Oct. 27 (TYO): Increasing Diversity by Increasing Access (IDIA) Organisation, Kohima Law College Nagaland Chapter ajuanga Shamator district kübok A Law for All Sessions ta sür sentong ka October 27, 2025 nü ayongzuka liasü.

Iba sentong ya St. Xavier Higher Secondary School aser

Government Higher Secondary School nung ayongzük, kong kaketshir nem tzüzüing-ozüing, legal rights aser legal field nung career opportunities indang angazükdakja liasü.

Shisalen sayur pezü den IDIA nung team leader ajanga lanur tem tashi agütsüba aser ochi obendang asoshi legal literacy nungdakba rateta ashi.

Kasa sentong nung kaketshirtem den fundamental rights, anogoshi takum nung ozüing agi shilem balala agiba aser legal education nungdakba indang sensaksema liasü.

Iba session nung kaketshir aser kaket reju ketdangsürtem tejangraba tulu nung dena IDIA-i yimdak-yimtsüing nung legal awareness agütsüba atema tenüingsang agüja liasü.

AHOD aser HODs senden thinener

Dimapur, Mongputeni/Oct. 27 (TYO): Administrative heads of Department (AHOD) aser Heads of Department

(HODs) senden October 29, 2025 nü amentsü Department ajanga October 22, 2025 nü sangdonga aliba ya tarutsü nung

sangdong ka magütsü tashi thinena atar, ta Home Department sangdong ka nung metetdaksü.

Nagaland nung 22nd Annual CPA India Region Zone-III alitsü

Dimapur, Mongputeni/Oct. 27 (TYO): Nagaland nung 22nd Annual Commonwealth Parliamentary Association (CPA) India Region Zone-III Conference ayongzüksü renema lir.

Iba mungdang ya Nagaland Legislative Assembly nung November 9-13, 2025 anogotem "Policy, Progress & People: Legislatures as Catalysts of Change" omen kübok alitsü.

CPA India Region Zone-III

ya Northeast states ti asoshi tongtipang sapang ka lir, kong region nung timtem balala aliba bentettsü asoshi jembishinü akar, rongsenketzüing terenlok, policy valala, tashi taitba aser telungjemba region akumtsü onüktem awajemer.

Iba mungdang nung Lok Sabha Speaker Om Birla ya Chief Patron asütsü aser Nagaland Chief Minister Dr. Neiphiu Rio ya Vice Patron asütsü.

Nagaland Legislative Assembly indang Speaker, Sharingain Longkumer, shiba CPA India Region Zone-III indang mendenpuba lir, pai Northeast Legislatures indang Presiding Officers aser tongtipang nisungtem dang iba mundang nung adentsü jaokba osang agütsüogo.

Iba sentong nung Plenary Sessions, Expert panels, practical workshops, stall exhibition aser sobaliba sentongtem alitsü.

Chungai Phom-i Miss Phom 2025 korang ajangzükogo



Dimapur, Mongputeni/Oct. 27 (TYO): Yingla Welfare Society ajanga Multipurpose Hall, Longleng nung "Radiate Confidence, Redefine Beauty" omen kübok Miss Phom 2025 beauty pageant final October 24, 2025 nü ayongzuka liasü.

Iba tetoktepba nung arishi küm 23 tain Chungai Phom-i Miss Phom 2025 takok korang ajangzuka liasü.

Arishi küm 24 tain A. Chumei Yajem nem First Runner-Up aser arishi küm 21 tain Lekup B. Phom nem Second Runner-Up sempet agüja liasü.

Sentong akhumdong Additional Superintendent of Police, Longleng, Hiatwa Iralu-i contestant tem dak tasü tait mulungsentsü aliba atema tenüingsang agüja liasü.

Pai aier chanutem dang

tetsübo makai pei mangdang arishitsü ayongzuka liasü.

Iba tetoktepba nung tetendangertem ya Neitho Khamo, PR and Marketing Manager, Beauty and Aesthetic Society of Nagaland (BASN); C. Tsalimse Sangtam, EAC, HQ Longleng aser M. Chingong Phom nungertem liasü.

Iba sentong nung Choreographer Chumei Phom, Show Director Moile Longkongly, Official Photographer Mac Phom, Official Designer Bukam Phom, aser Official Makeup Artist Phakmei Phom liasü, kong Hentok Konyak-ia ken tena liasü.

Miss Phom 2025 nung Subtitle angurtem yamai alitsü: Miss Congeniality: Chungai Phom,

Miss Beautiful Smile: Denja Phom, Miss Talent & Miss Perfect 10: T. Nyiphen Phom aser Miss Multimedia: H. Nyumung.

Kohima nung nisung tepsetba lokti balalai aitsür

Dimapur, Mongputeni/Oct. 27 (TYO): Nagaland nung tetsür basketball asayar tajung aser küm tetenzüklen Guwahati nung aliba U23 National Basketball Championship nung state tenüing nung shilem tajung agila Vihozhonu Zao (Asür Keneithuto Zao jala0 tepsetba ajanga kanga aoksar aser jashir, ta Nagaland Basketball Association (NBA) sangdong ka ajanga ashi.

Vihozhonu ya asayar ka kisüing masü, la ya teimla, yimya tajung aser temulungtetba tulu aliba temaitsü ka liasü. La dak sempet tajung jenti liasü, saka azüdokshi agi la takum tembangtsüogo.

Ibai lair kibong aser külemi asayartem atema kisüing masü saka asayar ajunga asoshi tesüingmangtsü takoksa ulura lir.

NBA-i iba azüdokshi khukhua aitsür aser ozüing amshir aser state nung lenirtem dang aibelener jangjateta aputsü ajungshir.

Onoki sorkar dang tekeraba nung ochi obendang agütsütsü ayongzük. Onok asoshi sempet tajung aliba nübu ka takum samaba mang ayimer aser kasa mapang Nagaland nung asayar ajunga kumzuka ayutsü akangshir. Vihozhonu-i ajungmesor mulungjang nung la teti takum alitsü aser ochi obendang asoshi onoki maneni nokdaksü, ta NBA sangdong ajangasa ashi.

Old Minister's Hill, Kohima nung alir tetsür ka October 24, 2025 aonung tepsetba onoki khukhua aitsür, koba ajanga nüburtem mulungjang anokshitsü, ta Nagaland State Commission for Women (NSCW) sangdong ka ajanga ashi.

Iba ama mapa ya nisung meimchir asoshi mezüingmeshi tulu lir, ta ashi.

Commission-i iba ken o suo-motu cognizance agiogo aser inyakyim ajunga kanga junga repranga atar. Ozüing amshirtem dang iba ken o tekeraba nung bushisüingdanga

aibelener nem tapet temerenshi agütsütsü ayongzük.

Kasa mapang colony nung alirtem aser nüburtem dang bushisüingdang den akokba lenmang nung yariteptsü ayongzük.

Iba ama tazü mapa ya tejakleni aoba lokti nung alitsü metemsü. Mangyimer kibong den onok nokdaka lir aser ochi obendang bushiba nung akok tashi yariteptsü, ta NSCW sangdong ajanga ashi.

Maneni, arishi küm 22 tain Vihozhonu Zao tepsetba atema süngmanger aser jashir, ta Southern Angami Students' Union (SASU) sangdong ka ajanga ashi. La tasüing ya October 25, 2025 anepdang nisung memesük yimya nung tepseter yuja aliba ngutet.

Iba mapa tamajung magizükteter aser tesashitiba jenjang nung aitsütsü langa lir. State sorkar aser ozüing amshirtem dang tekeraba nung mera agia ochi nung iba tatalokba bushisüingdangtsü, aibelener pua tapet temerenshi agütsütsü akhangar, ta SASU sangdong ajanga ashi.


Nüburtem aser CSOs tem dang Vihozhonu Zao atema ochi obendang akhangba nung teka amteper nokdaksü ayongzük. Ochi angatetba nüburtem dang onok den külemi iba ama mapa tamajung tanaben meinyaktsü asoshi nokdaksü ayongzük. Asür kinunger aser tembartem nung onok dena lir aser ochi obendang agüja aibelener nem temerenshi magütsü tashi onok anisüingzuka malitsü, ta SASU sangdong ajangasa ashi.

Western Angami Youth Organisation-ia sangdong ka nung Asür Keneithuto Zao'er jala Vihozhonu Zao tepsetba khukhua aitsür, ta ashi.

Tai maket nisung ka dak iba ama mapa tamajung inyakba ya nisung meimchir temeden nung aibelenba lir. Ozüing amshirtem dang tekeraba nung bushisüingdanga aibelener nem temerenshi tesashitiba agütsütsü ayongzük, ta WAYO sangdong ajangasa ashi.



Samagra Shiksha Nagaland ajanga Mt. Tabor Retreat Centre, Kohima nung October 24, 2025 nü State Level Kala Utsav 2025-26 sentong ayongzuka liasü. Kala Utsav ya Department of School Education and Literacy (DSE&L), Ministry of Education (MoE) indang sentong ka lir, koba ajanga Secondary Stage nung kaketshirtem indang sempet jangjateta sayudaktsür.



October 27, 2025 nü Seychelles nung India tatong tir, C.P. Radhakrishnan aser Seychelles tatong tir, Sebastien Pillay na senden amendang tangokba noksa nung angur.

Tanü nikongdang Cyclone Montha agi Andhra aser Odisha kongshitsü

New Delhi, October 27 (Agencies): Mongolbarnü Cyclone Montha Andhra Pradesh tzyüimkü atongtsü lia Andhra Pradesh aser Odisha state sorkartemi iba yipru tesashi atema junga renemogo aser district aika nung disaster response teams yoka lir.

Hombarnü iba yipru ghonda ka nung kilometer 15 kera northwest tsütsüleni odar aser anepdang 5:30 ako meta westcentral aser southeast Bay of Bengal nung liasü.

Hombarnep iba yipru tesashi ya Kakinada nungi kilometer 620 pilar liasü, Visakhapatnam nungi kilometer 650, Chennai nungi kilometer 560, Gopalpur (Odisha) nungi kilometer 790 aser Port Blair nungi kilometer 810 pilar liasü.

IMD-i, "Taruba ghonda 12 tsüngda iba yipru ya maneni northwest tsütsüleni aotsü aser October 28 anepdang tashi nungbo cyclonic yipru tesashi akümtsü," ta metetdaksü.

October 28 nikongdang mesüra aonung iba yipru ya Andhra Pradesh tzyüimkümlen Machilipatnam aser

Kalingapatnam na tsüngda Kakinada anasa süütsü, aser iba mapang nungji mopung ghonda ka nung kilometer 90-100 nungi kilometer 110 tashi kera aontsü, ta IMD-isa metetdaksü.

Odisha sorkari ali nemzüka aliba tesemtem nung alirtem aser tenemlen aliba regions nung alirtem aienshidaktsüdar.

Revenue & Disaster Management Minister Suresh Pujari-i, Malkangiri, Koraput, Nabarangpur, Rayagada, Gajapati, Ganjam, Kandhamal aser Kalahandi district tem nung disaster response team 128 lezmükja lir, ta metetdaksü.

"Iba lendong atema state sorkar kanga junga renema lir, talisa lendong agi kongshitsüsa aliba tesemtem nung ajak renemogo. Hombar nikongdang 5:00 ako tashi nungbo lendong ataloktsüsa aliba tesemtem nungi nisung ajak aienshidaktsür alitsü," ta pai metetdaksü.

Paisa, IMD-i "red warning" sangdonga item districts nung tzünglu sashia aruba den külemi mopung ghonda ka nung kilometer 80 tashi kera aontsü

ta shiogo, ta metetdaksü.

Küzmükba aser teyari agütsüba maparen inyaktsü atema Odisha Disaster Rapid Action Force (ODRAF) nungi team 24, National Disaster Response Force (NDRF) team pongu aser Fire Service team 99 lezmüktsüogo, ta paisa metetdaksü.

Andhra Pradesh nunga sorkari iba yipru atema maparen ajak renemogo. State Civil Supplies Minister N. Manohar-i, sorkari Public Distribution System (PDS) kübok chiyungtsü agütsütsü aser shelters nung jenoka alir ajak nem teyari agütsütsü, ta metetdaksü.

Andhra Pradesh State Disaster Management Authority (APSDMA)-ia October 28 nü tzyüimkümlen aliba district tem nung tzünglu sashia arutsü, ta tekümdangtsü metetdaksü.

APSDMA Managing Director, Prakhar Jain-i, "State tzyüimkümlen tzünglu sashia arutsü anungji nüburtem kimai mayazüktsüla, talisa angopurtem tzyüimi maotsüla," ta metetdaksü.

Bengal aser Tamil Nadu densema state 12 nung SIR tenzüksü

New Delhi, Mongputeni/ October 27 (Agencies): Hombarnü Election Commission of India (ECI)-i, electoral roll yanglushitsü atema states aser union territories 12 nung Special Intensive Revision (SIR) tenzüksü, ta metetdaksü.

New Delhi nung osangbenertem den jembidang Chief Election Commissioner, Gyanesh Kumar-i, Bihar nung SIR takok ngua agiba sülen EC-i State Election Commissioners 36 den senden mena linük tesem ajak nung SIR mapatong atema telemetba agi, ta metetdaksü.

"SIR tanabuba shilem atema Mongolbar nungi polling officials training tenzüksü. Chief Electoral Officers aser District Electoral Officers ajak dang yanü tashi nungbo yimtenren party tem ajurua parnok nem SIR inyakyim metetdakjang ta tuyuogo," ta Chief Election Commissioner-isa metetdaksü.

Bihar nung SIR mapatong kübok voters lakh 65 tenüng agienogo.

Yimtenren party tem aser

lokti tentet karibo SIR mapatong ajanga tim masüba nung voters tenüng aika agienogo, ta tai tonglokja liasü.


Election Commission-i, SIR shilem tanabuba kübok Tamil Nadu, West Bengal, Kerala, Assam aser UT of Puducherry densema state 12 nung SIR mapatong tenzüksü, ta metetdaksü.

SIR shilem tanabuba kübok states/UTs 12 ji Andaman & Nicobar Islands, Lakshadweep, Chhattisgarh, Goa, Gujarat, Kerala, Madhya Pradesh, Puducherry, Rajasthan, Tamil Nadu, Uttar Pradesh aser West Bengal state tem lir.

Item states rongnung Tamil Nadu, Puducherry, Kerala aser West Bengal nungbo sangküm assembly election agitsü.

CEC Kumar-i, Assam nung SIR atemabo temeja sangdong ka agütsütsü, ta metetdaksü.

EC-isa, SIR mapatong ya yimtenren den sendaktepa mali, ajisüaka election nung tim masüba mapatem nokdangtsü aser democratic inyakyim tashi itshitsü atema lir, ta metetdaksü.



October 27, 2025 nü New Delhi nung Rajasthan Chief Minister, Bhajanlal Sharma-i Ato kilonser Narendra Modi ajurudang tangokba noksa nung angur.

Justice Surya Kant-i Chief Justice Of India tenangzükba agitsü

New Delhi, October 27 (Agencies): Tang Chief Justice of India (CJI) teinyakdak, Justice B.R. Gavai taruba ita November 23 nü CJI menden nungi anisüngzüktsü aser pa melenzüktsü atema pai justice Surya Kant tenüng benokogo.

Osang angazükba agi, Ministry of Law & Justice-i CJI tasenba shimtsü atema inyakyim tenzüka Law Ministry-i Chief Justice Gavai dang pa melen CJI shimtsü atema tenüng ka benokang, ta metetdakja liasü.

Memorandum of Procedure (MoP) kübok CJI menden atema Supreme Court nung senior-most judge shimmer, aser tang senior most judge ji Justice Kant lir.

Justice Surya Kant ya 1962 küm February 10 nü aso. Pa 1981 küm Government Post Graduate College, Hisar nung graduate asü aser 1984 küm Maharishi Dayanand University, Rohtak nung Bachelor's degree in Law renema liasü.

Justice Surya Kant-i 1984 küm nungi tenzüka Hisar nung

aliba District Court nung law practice asü, iba sülen 1985 küm Chandigarh-i oa Punjab & Haryana High Court nung inyak.

2011 küm pai Directorate of Distance Education, Kurukshetra University nungi Master's degree in Law renema liasü.

2018 küm October ita nungi pa Himachal Pradesh High Court nung Chief Justice inyakba sülen 1019 küm May 24 nungi Supreme Court nung judge inyaker.

Justice Kant ya tamalen National University of Study & Research in Law, Ranchi nung Visitor inyaka liasü aser National Legal Services Authority (NALSA) nunga Executive Chairman inyak.

Justice Surya Kant ya tang Supreme Court of India nung senior most judge lir aser India nung Chief Justice of India 53bubaji pa asütsü.

Pai November 24 nü CJI tenangzükba agitsü aser ita 15 shi CJI inyaktsü, kechiyong pa kümsük 2027 küm February 9 nü tembangtsü.

Supreme Court-i state/UTs ajak nungi chief secretary tem jaoker

New Delhi, October 27 (Agencies): Hombarnü Supreme Court-i West Bengal aser Telangana na dak alaka tanüngba states aser union territories ajak nung chief secretary tem dang November 3 nü court matsüngdangi arung, ta tetuyuba ka agütsüogo.

Kibur mali moapu nung nemzüba azü tebilemtsü ken o dak sendakba nung affidavits ajanga telangzüba magütsüba

atema chief secretary tem jaoker. Justices- Vikram Nath, Sandeep Mehta aser N V Anjaria nungeri akümba special bench kati, Municipal Corporation of Delhi, West Bengal aser Telangana state temi dang August 22 nü Supreme Court-i tuyuba ama affidavits ajanga telangzüba agütsüogo, ta metetdaksü.

August 22 nü tetuyuba nung ajak abensaa shia lir, ajisüaka

tanüngba states/UTs-i affidavit ajanga court nem telangzüba magütsü, ta bench-i metetdaksü.

Taküm August 22 nü Supreme Court-i, kibur mali lenmang nung nemzüba azü tebilemtsü ken o ya Delhi-National Capital Region (NCR) atema dang masü, ta shia states aser Union Territories ajak dang nungia telangzüba meshia liasü.



October 27, 2025 nü Mumbai nung 'India Maritime Week 2025' sentong nung Union Home Minister Amit Shah, Maharashtra Chief Minister Devendra Fadnavis aser Union Minister Sarbananda Sonowal nunger külemi tangokba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, OCTOBER (MONGPUTENI) 28, 2025

Lendong aketba kin

Dimapur anasa Niuland district kübok Hakhizhe yimtak Muslim nunger ayanger kati tenu den tener jala aser jabaso na dena par asemprongla kenyongi nok agi tepsetba tatalok osang ya asenok ajak asoshi kanga tetsübutüsü aser taoksatsü osang ka lir aser iba nisungba yagi asen nisung dak dena nok ai asübo komaka süla ta kanga shisabolua bilemer. Ibai asenok asoshi tebilemdangtsü aser kanga kümdangtsüba tatalokba ka lir. Nagaland tenemtsünglen asenok alu ayimdak ajaklen item lendong aketba Muslim nungertem, sükdangra, asenok dang nungia nütsüng teimba asütsüsa asenok lu inyaksürtem lir. Parnokji mezüngbo nisung ana aruba to, küm ter tsüngdabo memeteti parnok ter kümadoker aser küm 20 tsüngdangbo ano parnok semer lirka kümadoker ta asen lu nung lia lia parnokji asen yimer nütsüng yongsük dang nungibo teimba kümadoker. Itemji kodang asen lu jagi parnok yim küma küm semer lir dak tali lia odir, parnokji asen yimer akümtsü aser parnok denji kibalempuetsü, anungji kinungtsü tenüng nung asen luji teti atema par lu akümtsü. Kasaji, asen jabasotemi parnok jala agitsü aser azü nung ka dang kümadoktsü. Iba amaji kodang asenok iba tipmatemba kin den mezüpelangdir, asen lokti asen asen lima kodang süngjem malitsü, kechiyong parnok ya süngjema melitetba kin lir. Aji oda, alima nung ya shir nütsüng teimba südir, par tashi nungji yimtena aser aser loktia atsür aoer, anungji tang amaisa asenoki Muslim nungertem nem asen lu yimdakja senso kümdaktsü nungbo, memenui 2075 tashi nungbo, talisa Dimapur aser Niuland ama yabo Msulim nunger lima kümadoktsü. Item nübortem ya timtem tarem, mapa nung temerang, kechiyong par lima nung parnok ya kanga timtema aliba nübortem, anungji alima tajungba bushia ayangai aruba purtem lir. Tanü Europe nungbo tesem aika nung joko yimten yimsüsüba mendena Muslim nungertemi agiadoker aser sensosangertem nungibo bendanger Muslim nunger yashi arurtemjiang teimba, saka ayanga-ayanga lisopur sen agi parnok takarba aküm aser nütsünga parnoksa teimba renlok, anungji election nunga parnoki yariba purtem dang adoker aser yimten temzüng ozünga parnok mulungba nung latettsüsa akümer. Iba tiaji ngua, US nungbo temelaba shitak melii ayanga amongertem aika meindokba asenoki nguogo aser tangbo US-i mashi nisungbo marudaktsür. US nunger amaji asenoka kümdangtsüba mapangji tang ya lir. Asenokbo tang amaisa mebilemdangi aser mekümdangi tangar bendanger lendong aketba kinji asen lima nung soyapokyardakja senso kümdaktsüra, kobanü parnok teimba, takarba aser tashi tuluba kümdir, iba anogo nungji parnoki asenok lepa tsünga meindoktsü. Ashiko, tanüa Niuland ama nungbo asen nisung dang nungibo Muslim nunger nütsüng teimba alitsüa akok, ibaji shitak süra lendongji yangji keta lir. Atangji, asenoki alu mapa inyaknüaka asenok nübo mali, anungji tangar nübo bushia inyakdaktsütsüsa akümer aser item mapa inyakertemji Muslim nungertem dang teimba angur, kechiyong parnok ya par lima nütsüng tali züinba agi mapaa maka aser chiyongtsüa maka timtemertem lir, anungji asenok asoshi parnokji jenjang dalang agi nübo peria angur. Aji asenok asoshi kanga nüngdak aser mepaidoktetba mapa aser mapang ka lir. Aji oda, asenok nübo maliji mapa meinyaktsü mesüra alu mayimtsü ta masü saka tang amaji bendanglen nungi nübo bushia bener arua asen mapa inyakdaktsütsü akok saka mapa inyaka-inyaka ayangertemang kibur kümer, shitakba kiburtemjiang pei lu aser pei yim toktsür aotsüsa mataloktsüsa ILP ozüng ya kanga nendaka shitak benshitsüla aser nütsüng talila merenloktsü atema asen den ali tashibo tebur kati tetsür ka dak tali kinungtsüsa meyudaktsütsüla. Iba denji asenoka teti tangar dak metaloka melii asensasa asen mapabo inyaktettsüsa aluyimba aser kisüjensü mapa angazüktsüla. Tanübo par nisungi par kinunger tepset saka asüngbo parnoki asenok ajak tepsettsü, kechiyong parnok dak taochi mali aser parnok asoshiibo aji alima nung par yimli ulushiba nokinketer mapa asütsüa akok. Aji mamali.

OLEMSABANG

SHITI -THE LETTER

~ Marnungtet Ozukum

(Iba Yimdangjem otsü ya Tir Yimyim aser Bookipedia nati ayongba toktep nung mezüng takok jenjang anguba liasü.)

(Yashi adok nungi...)

Ita ka sülen

Anepdangka yakta ni saker taktang nungi atoktang kü kishi nung envelope ka meleptaka liasü..Ku taküm nung ni shinga tangi shiti mezülutang aser kü tangia shiti zülutsübur mali,küm aika tejaklen Atula-i shiti yok nungba ta yonya ata saka aji matalok.shitiji kü hiti masütsü sudi mesura aibelena yutsuba asütsü sudi ta bilema envelope ji reprangtang nung;Ku tangi yokba shiti saka shiba nungi aji envelope nungji zulua mali asu. Ni bilemtet, shiti ajaga osang yoktsü ta ashibato südi ta bilema,ni maotsü mulungteter liaka,iba envelope lapok nung shiti ka liasü, shitiji yamai;

To,

Jungshiba

.....(Ni aliba tesem zulua lir)

Mokokchung:Nagaland

Luroi 30, 1998

Kü temeim,

Amanger iba shiti ya nai taküm tajung nung agizüka azünger.

Ne tangi iba shiti yoktsü yakta nungi meranger saka ni na aliba tesem tejangja memetetba yong iba shiti ya mapang shitak nung ne tangi ni mezulutet.Saka ni asoshi tia akatsu asen class mate Amenla Kohima town nung ajurua la den sensak asem dang lai na aliba tesem ashi nung ni temulung nung tesangwa tulu agi asung,talisa lai ku tang; ana majurtepa sulen na kanga tejashi agi sunga ni menungraba indang shisemdang ni asoshi ne temeim tali metet aser ni pelar, saka sasa bilemer aser ku aibelen tuluka lir ta ni nangzucker.

Ana park nung kazür senshiba nikongtsü,kodang ni ki atong obala aser ojala nati küdang ku khu aritepa renemtsü asoshi ashi.Kechiba khu renemer aser kechi aotsüba kü tang rasa mashi nung ni kanga pangka saka tensaji kanga majung ta ajiteta parnoki ashiba ama ni khu renemer,parnok den ni ozü jeep nung mener apusoa ozu kiyonger,kidanger aser medemer shinga tanga meshi apusu.Onok Phek disticti ai aser idakji ki tasen ka mesema ali tenzüK.Ne tangi ni shiti zulur lila saka obalai shinga tangi onok tesem taseni belenba indang melemsateptsu indang kanga nendaka ashi nung ni shiti meyoktet.Tesüsa ni metet,obala nisung tamajunger kari pua bener oer rishikangshia tepsetsüba tasa aliba osang angazüka ozü kibong tekartiba nung Mokokchung nungi ainshitsüsa aküm.Kechiaser obala sorkar mapa nung ochishia tenzüKba nisung aser Naga linük meimba yong Ochi metetdaksü pai inyak.

Phek district nung küm asem ali aser obala transfer Kohimai adok,anungji ozü kibong ajak Kohima nung lia ni yangji college azüng.Pungmang ama

tang bilemer,Obalai ochi meimba yong tanübu injang agi pa taküm aser ochi tepsetogo.Naga nunger iba tia tashi aküm no?,Naga Nüchiso asoshi Political Force tenzüK saka nüchiso agutsütsü melen, nüchiso bushiba prangpong kasa agi pei nübur amokmerener,pei nübur alener aser tsübüdaktsura koda nüburtemi asen linük meimtsü? Naga nunger rongsen, nükmerem aser anemsü shisatsü nungi tama mesala tashi asen Naga nunger nüchiso mungutet.Naga lenirtemi ochi me-meimra linük kodanga memeimtsü.Obalai Naga linük meim nung pai ochi akanga soit saka tiyazü lenir shirnoki linük meimer ta ashir saka ochi metizüktet parnoki obala taküm samatsüko.

Shibai obala kaset pa policei tanü tashi meputeter saka Tsüngrem tenüng nung pa tang tai ni adoker aser iba nisung ni ajurua Ochi lenmang sayuner.

Iba tako khuret neden lemsatepa ajanga ni tepela tesangwaba akümtsü ta metet nung ne den lemsateper.Na ajurutsu ni yongyaseter aser ku obala asüba tako neden kulemi mener tali lemsatepner aser ni nedak nungi anisüngzüK angutsü ta amanger.

Ne meimla,

Atula.

Kü ket nung iba shiti tanü tashi lir, ni Atula ajurutsü aser jembitsü yongya liasü saka ni laden koma ajuruteptsü? par tebu tepsetsangji ni saka lai aji memetet, ni la meimer aser lai ni meimer saka lai ashiba ochi nung ni melitet,ni Naga nuchiso nukjidong managet sen anagetba yong Naga nuchiso milen ni remsemptsüko.Tanü tashi Atula tangi ni telangzüba magütsüteter,lai ni ajurutsü yongyar saka ni asoshi aji tamakoktsü.La tebu ajuruteptsü aser la kenübo asungdangtsüba indang bilembato, tanübo iba nisung ni tepeset. La nungi ni küm aika shiti yongya ata saka tanü iba shiti angudang ni temulung amsar aser asüktema nüktzü alur.Ni shisa rama akümer,ku aibelen aser azü tokshiba mapa ni bilemtetang ni tejashi aser tesasa agi tali asünger.Atulai "Naga nunger India nungi nüchiso angutsuji tongtibang masü saka Naga nunger rongsen, nükmerem aser anemsü shisatsu nungi tama nüchiso angutsüla aser aji tongtibangtiba" ta ashiba tanü angateter saka taküm raksar iba O angateta arur.Tanü ni Atula nungi tebu auya aser tetsü nungi kinungbu auya, Naga linük nungi Ochi auya, anungji ni auyar taküm mesüka lir aser tepela munguteter.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Seoul nung World Evangelical Alliance senden tenzükogo



October 26, 2025 nü South Korea yimtiba, Seoul nung World Evangelical Alliance (WEA) conference tetenzük sentong nung attorney Botrus Mansour-i jembidang tangokba noksa nung angur. Iba conference tatembangbuba sentong nung Mansour-i WEA Secretary General mapa agizüktsü.

Seoul, Mongputeni/October 27 (Agencies): South Korea yimtiba, Seoul nung World Evangelical Alliance (WEA) 14buba mungdang tenzükogo.

Sarang Church nung ayongzükba senden nung adentsü atema alima tesem balala nungi Khristan lenirtem noklang aika adenshiogo.

"The Gospel for Everyone by 2033" omen nung ayongzükba senden ya October 26 nü tenzük aser October 31 nü tembangtsü. WEA nung Regional alliance 9 aser national alliance 161 densema lir aser iba tentet nung Evangelical Khristan züngsem million 600 dak tali lir.

Iba senden tenzükja okila jembidang WEA Executive Chair, Rev. Goodwill Shana-i telongjem nung mangdang tasen yur inyaksü ayongzük.

Yisu Khrista tasü nungi tanaben shia aruba sülen küm 2,000 abensaba mongji 2033 küm amongtsü, aser iba küm tashi nungjibo alima tesem ajaklen Yisu Khrista osangtajung proker alitsü mangdang yur inyaker.

Rev. Shana-i, "Iba mungdang ya senden ka dangbo masü. Iba ya kibong longjemba lir, sarasademsü mapang ka, shisadangtsü mapang ka aser taruba kümtem nung WEA-i alima nung Arogo tenzüktsü atema imdangjema shisadangtsü mapang ka lir," ta ashi.

"Iba mungdang ya Alliance atema puti otsü yanglutsü mapang ka lir. Iba mapang ya International Council tasen kati melenba aser Secretary General tasen ka nem wadang nungloktsüba mapang ka asütsü," ta pai ashi.

"WEA indang tashiji inyakyim nung masü saka alima tesem balala nung Arogotem aser lenirtem tesendaktep dak keta lir. Alima nung temelenshi adokdaksütsü atema asenok evangelical longjema lir. Kintem rongnung Khristai agütsüba telongjem sayutsü atema asenok longjemer," ta pai metetdaksü.

Iba senden tatembangbuba

sentong nung Attorney Botrus Mansour-i WEA Secretary General mapa agizüktsü.

Tetenzük sentong nung jembidang Mansour-i, "Alima tesem balala nungi aianu aser adianutem Khrista-zü ajanga longjemba ngua pelar," ta ashi.

Tenüngsang Ken 133 aser Yohan tapu 17 nung ajemdaker pai tamangertem longjema alitsü ayongzük. "Yisu Khrista-ia longjema lidaksütsü atema sarasadema liasü. Iba telongjemji shisadangang, ibaji Tebu, Techir aser Tanela Temeshi ama asütsü. Iba amaji longjema alitsü atema asenok jatet," ta paisa metetdaksü.

Mansour-i, alima nung evangelical kibong nung oshi aser sobaliba balala aika lir, ajisüaka item tepilaji ajanga Arogo nung telemsa madokdaksütsüla saka tashi itdaksütsüla, ta ashi.

"Asenok oshi-open aser sobaliba balala lir, ajisüaka piladaksüba jara raksatsüogo. Khrista nung asenok ka dang. Tsüngremi asenok nem nungloktsüba wadang renemtsü atema asenok longjemer jajadi," ta paisa ayongzük.

Asia Evangelical Alliance chair, Godfrey Yogarajah-i tejaokertem pelaa agizükba den külemi lenirtem dang Arogo tashi itdaksütsü, telongjem tali adokdaksütsü aser alima tesem ajaklen Khristan temeim sangdongtsü ayongzük.

Paisa iba senden nung shilem agirtem dang Tanela Temeshii jembiba ola angatsü aser longjemer mission wadang inyaksü ayongzük.

"Iba mapang ya tanela nung asentenshiba mapang ka aser tarutsü nung tayongzükba balala koktettsü atema bangjemba mapang ka südakjang ta sarasademer," ta paisa ashi.

Korea Evangelical Fellowship nung chairman, Rev. Seok-soon Im-ia Korean Arogo tenüng nung salem lemsatepba den külemi iba sentong ayonger Sarang Church aser Yoido Full Gospel Church na dang pelaba lemsatep.

"Iba Assembly tenzüktsü atema Korea nung Arogotemi bendanga agütsüba ya Kibuba nungi anguba taochi ajanga lir, aser ibaji ajanga Arogotemi alima den-a iba taochiji lemsatepner. Iba senden ajanga asentenshir alima tesem ajaklen Khrista osangtajung proktsü atema ajungmesodakjang ta sarasademer," ta Rev. Im-i ashi.

Iba mungdang omen "The Gospel for Everyone by 2033" ya Efesa 2:13-18 nungi agitetba lir. Taruba küm 10 tsüngda Khrista osangtajung angashidaksütsü atema ajak nem maongka agütsütsü mangdang yur WEA-i inyaker.

Anogo troknü senden nung adenertemi tekülem sentong agiba den külemi sarasademsü, onük balala nung o lemteptsü aser national alliance o regional alliances tsüngda ano taliba amalitepa inyaksü atema jembitsü.

1846 küm tentetba World Evangelical Alliance ya alima nung evangelical Arogotem aser organizations longjemtsü atema sabang ka lir. Evangelical alliances, networks aser commissions-i local Arogotem tashi itdaksütsü, tamangba yimsü temeden ajungkettsütsü aser Khrista temang nung ka küma longjemtsü atema inyaker.

Uttar Pradesh nung pastor ka densema Khristan asem apu

October 27, 2025: Uttar Pradesh nung Khristantemi Hindu nunger kar mesüzüka Khristan yimsü dangi meyipdaksütsü merang, ta tai tongloktsüba sülen pastor ka densema Khristan asem puogo, ta osang ka ajanga metetdaksü.

Tawa India nung temaba court, Supreme Court-i linük nung nütsüng ajema alirtem amokmerentsü atema anti conversion özüng amshir, ta metetdaksüba sülen anogo ishika tsüngda Uttar Pradesh nung iba özüng kübok Khristantem apur.


UP kübok Bareilly district nung police-i Pastor Sumit Masey, Amit Masey aser Sarita nunger apu. Ano tai tonglokja

ANOGO ABEN TSÜNGREM DEN

Tashi

Aser Pai ashi, Asenoki Tsüngrem yimli koda medemdangtsü ? Mesüra kechi o-entepba agi asenoki aji sayutsü. Mark. 4:30

Tashi (power) kar lir koba agi raksatsür. Tashi kar lir koba agi yanglur. Yanglutsüba tashi agi taküm, tepela aser yimjung agütsür. Ibai talenba masü saka nüjiba, tasüba aser taküm teraksatsüba masü teyanglushitsüba. Teyanglushiba tashi ajanga tesendaktep aser ajak ka küma longjemdaksüba sempet agütsür. Yisu Khrista kangki dong nung metaba mapang iba yanglutsüba tashi tematiba nung sentsüwangshia atong. Kangki dong nung satani pa tashi ajak amshia Khrista samatsütsü merang, saka Tsüngrem tematiba tashi ajanga samatsüba melen meimchir nem taküm agütsü. Temenen taa ajak asoshi talang agütsü aser iba jagi Tsüngrem mulong süa liasü. Khrista kangki ajanga kü nem aser ne nem takokba agütsür aser Tsüngrem den asenok tesendaktep meteter. Khrista asenok menen asoshi aru aser Pa asüba yanglushiba tashi asenoki angür. I b a tematiba tashi asoshi asenoki pelar ta sayutsü nüngdak. Asenoki iba tematiba tashi mesüka inyaksü makok nung asenoki Tsüngrem dang , nai kechi inyak iba tashi asoshi kanga pelar ta shidi.



Kelingmen Arogo nung October 24-26 2025 anogotem nung Kelingmen Laishir Telongjem-i "Taküm Rangben Renemshiba" 1 Tesa 5:23 omen nung ajemdaker asentenshi sentong ka ayongzüka katsüba asoshi Arogopuri pelaba lemsateper. Talisa iba sentong nung Dr Chujiang President, IEF den külemi Tanüla Pusemer Mrs. Sunepla Sanglir, Mr. Tali Imchen aser Mr. Toshi Ozukum nungeri amangbapurtem temoatsü ngudaksüba asoshi pelaba lemsateper, ta Kelingmen Baptist Arogo nung pastor, Manen-i sangdong ka ajanga metetdaksü.

alir Khristan ka, Satyapal bo i metetdaksü. jenshia senzüdar.

Uttar Pradesh Prohibition of Unlawful Conversion of Religion Act, 2021 kübok parnok nem tai tonglokja ken o benokba nung ajemdaker police-i parnok apu.

Rishabh Thakur aser Nirdosh Rathore nati police dang, Khristan missionary ka den tesendaktep aliba Khristantem jagi Hindu tsür ka aser tanurtem Khristan yimsü dangi meyipdaksütsü merang, ta metetdakja liasü.

Khristantemi Dalit nungertem dang nenok taküm jenjang tajungba kümdaksütsü aser taneptsü angutsü, ta mesüzüka Khristan yimsü dangi aika meyipdaksüogo, ta police-

Anogo ishika tejaklen Supreme Court-i Uttar Pradesh nung anti conversion özüng kübok Khristantem anema benokba ken o kar agienja liasü.

Supreme Court-i, inyakyim meshidakba dang masü saka Khristantem anema kuli tejangja mali, anungji item ken o ya tai maket nisungtem amokmerenba den kasa lir, ta metetdakja liasü.

India nung Khristantem anema inyakba tatalokba teimba aliba state ji Uttar Pradesh lir. India nung nütsüng shilem 2 shi dang Khristantem lir aser Uttar Pradesh nungbo Khristan nütsüngji shilem 1 dang nungi ishiba lir.

AO OSHI ANGAZÜKDAK:**TANÜ ANGAZÜKTSÜBA OJANG****Tongbang**

(V) kilem agi shibang (put up sheets to block sunlight and rain drops)

* Anü aser tzünglu nungi kümzüksü asoshi süra agi kilem tongbang.


Tongbenra

(n) süngdong tera rongnung tongtiba (main root)

* Tongbenra süadokra süngdong laoadoktsü.



Tir Yimym

OLONG PAITEP # 7312**TIPIEN**

1. Inyaker ajangtetba
3. Bangsemo adokdak
6. Shitak mesüi inyak
7. Ya mimong nung angur
9. Reprangzüik
10. Tasola
11. S _ _ _ _
13. Yagi ajak ashioktsür
15. Ki aokba oset
17. Ak shi nung inokba tasen
18. Ishika

-

(3)

-

(5)

-

(7)

-

(3)

-

(4)

-

(5)

-

(4)

-

(3)

-

(7)

-

(3)

-

(3)

LANGTSÜNGLEN

1. Meshidak
2. Tanaben soshir
3. Iba anogo
4. Meshi
5. Yagi mi tsükloker
6. Shi tapu ka
8. Yagi ayimer saka ozü masü
9. Ajokba shiruru ka
12. Inyaktet
14. _ _ _ hi
16. Akümüli nungi pilar

-

(3)

-

(7)

-

(4)

-

(9)

-

(9)

-

(3)

-

(3)

-

(3)

-

(3)

OLONG PAITEP # 7311 TELANGZÜBA**TIPIEN :**

1. Telok, 4. Aluru, 6. Ozüng, 8. Emk,
9. Kin, 10. Teti, 12. Süir, 13. Jen,
14. Ola, 16. Talak, 17. Mazük.

LANGTSÜNGLEN :

1. Tenükjang, 2. Luden, 3. Kioktsü,
5. Lenti, 7. Tajangzüik, 11. teronem,
12. Sempa, 13. Jahaz.

NAI-A YA METETTER

Odisha kübok Ganjam district nungi arishi küm 23 tain miniature artist K Bijay Kumar Reddy-i Guinness World Record tasen ka yangluogo. Reddy-i "smallest wooden spoon" yanglutetba atema iba naroküm angu. Pai yangluba spoon ji 1.13 mm (length) lir aser ajem (needle) nung tapok ajanga itettsü. Reddy dang 'Odisha Chalk Artist' ta ajar aser pa ya electrical engineer ka lir.

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimym bureau tem nung agüjang.

Kuki Students' Organisation-i New Delhi nung sentong ayonga agi

Imphal, October 27, 2025

(Agencies): October 25, 2025 nü Jantar Mantar nung Kuki Students' Organisation-Delhi and NCR (KSO-DNCR) ajanga Manipur nung Kuki-Zo nung atema temeten aser ketdangsübaren balaka meshia lungkak aitogo.

Iba sentong ya "Forged Government is Forged Justice; Separate Administration is True Justice" omen nung ajemdaker agi. Küm ana tashi kin o kin tsüngda raraba aser pei talidak toktsür aoba khuretem metetdaksütsü atema iba omen

amshir ta tayongertemi ashi.

Iba sentong nung kaketshirtem, human rights advocates aser lokti lennirtem aden aser parnoki Kuki-Zo nung kümzüka ayutsü tayongzükbatem agütsü.

Prime Minister Narendra Modi dangi züluba memorandum ka nung KSO-DNCR president Paajahup Guite-i May 2023 nungi Kuki-Zo nungeri timtem ajurua aruba aser temeten manguba indang shia lir.

Iba memorandum nung nisung 220 temai sign süa lir aser iba nung ashiba agi nisung

220 tema tepsetogo aser 60,000 tema pei talidak toktsür Manipur tesem balala nung relief camps aser kidanger state temi ogo.

Manipur nung "majoritarian-controlled state administration" ka kübok külemi liyonga aotsübaji tamakoktsü anungji India sorkar kübok administrative structure balaka nüngdaker ta memorandum nungsa shia lir.

"Onoki maongka masü saka temeten bushir. Kuki-Zo nung pei lima nung ainertem ama melidaksütsüla" ta KSO-DNCR-isa metetdaksü.

KSU-i October 28 nü Anti-Uranium Day amungtsü

Guwahati, October 27, 2025

(Agencies): Khasi Students' Union (KSU) nung South West Khasi Hills District Unit ajanga October 28 nü Anti-Uranium Day amungtsü osang metetdaksüogo.

Iba anogo ya anti-uranium activist Spility Lyngdoh Langrin sür küm 5 ajungba anogo lir aser KSU-i Domiasiat nung iba sentong agitsü.

State sorkar mesüra central agency shinga nema Domiasiat aser Mawthabah nung uranium mining mesüra related pre-mining maparen

meinyakdaksütsü ta KSU-i ashi.

Iba tesem nung alirtemi parnok ali nungi uranium agitettsü meranga anema noktaka arur ta parnokisa metetdaksü.

Anti-Uranium Day ya 2021 nungi kümshia amunger aser iba ya Spility Langrin nem tetushi agütsüba aser loktii parnok ali uranium exploration nungi kümzüka ayutsü nangzüikshiba tenüng nung amunger ta KSU-isa metetdaksüogo.

Langrin-i 1990s tetenzüklen nungi resistance movement anir

tenzüik aser October 28, 2020 nü pa tango satemba tashi iba anema noktaka bilemteter ta KSU-isa ashi.

Government of India aser Uranium Corporation of India Limited (UCIL) ajanga lar ali nung uranium mining asütsü atema sen crore aika agütsü saka lai ibaji magizük ta parnokisa metetdaksü.

October 28, 2025 nü Domiasiat nung anepdang 11:30 ako nungi sentong tenzüiktsü aser iba sülen Spility Langrin leper nung naro yuja tetushi agütsütsü ta KSU-isa ashi.

Arunachal Pradesh küok Namsai nung ULFA (I) züngsem ka apu

Guwahati, October 27, 2025

(Agencies): Arunachal Pradesh Police aser Assam Rifles külemi joint operation agidang ULFA (I) züngsem Anupam Dohotia apu.

Kakopathar Army Camp amakba nung iba ULFA (I) züngsem sendaktepa lir.

Sepaitemi pa ket nungi MQ rifle ka aser grenade tem ngutetogo aser iba ajanga ano telungpur maparen inyakttsü

sentong aliba kulitem nguogo.

Arunachal Pradesh Police aser Assam Rifles külem teloki October 26 anepdang Namsai nung ULFA-I züngsem apu.

Pa ya Anupam Dohotia (Thousen Axom) ta jangjaogo aser Tinsukia district kübok Barekuri nungi lir.

Tawa ULFA (Independent) telungpurtemi maparen balala inyakba aruba sülen Assam DGP Harmeet Singh-i

Honibarnü SSP Office Auditorium nung high-level security senden ka amen.

Dohotia ya ULFA (I) nung tongti züngsem ka lir aser October 17, 2025 nü Kakopathar Army Camp, Tinsukia amakba nunga shilem agiogo ta osang angazüker.

Pa ket nungi MQ rifle ka, injang 151 rounds, bottle grenade ka aser rifle grenade ka ngutetogo.

Golaghat Police-i Dergaon nung taila doctor ka apu

Guwahati, October 27, 2025

(Agencies): Golaghat Police-i Deobarnü taila doctor ka puogo. Iba nisung yagi Dergaon nung D.K.D. College Road anasa medical clinic ka lapoka lir.

Golaghat Police-i Fake Doctor R.C. Sen puogo. Pai pa medical practitioner ka ta tiyazü

jembi aser D.K.D. College Road, Dergaon nung clinic ka lapoka liasü. Pa anema Dergaon PS nung ken o ka benokogo ta police-i metetdaksü.

R.C. Sen ket nung medical qualifications mesüra registration maliser

shirangertem anepalua arur. Police nem osang ka sangoktsüba sülen clinic mita aodang kulikaket aser medical equipment aika puogo.

Dergaon Police Station nung iba atema ken o ka benokogo aser maneni bushisüngdang südar.

Tir Javier Milei-i Argentina midterm elections nung takok tulu angu

Buenos Aires, Mongputeni/ Oct. 27 (Agencies): Argentina Tir Javier Milei-i par party Deobarnü midterm elections takok ngudaktsüogo, shiba tir kümsük tenzüker mezüngbuba küm ana tashi senotsü indokba ajema 'free-market' temelenshi lidaktsü.

Par party La Libertad Avanza-i vote shilem 41 jungnüa nguteta Senate menden 24 aliba nungi 13 agitet aser lower-house menden 127 aliba nungi 64 agia liasü.

Iba takok ajanga Milei-i sorkar sen indokba ajemtsü aser market indang ozüng talenba salatsü pa indang sentong aliba mapa kuma inyaktsü tezüpaba kumdaktsür.

US Tir Donald Trump-i social media nung Milei nem tenüngsang agütsü aser, "Pai asenok ajak junga ngudaktsür," ta ashi. Vote magütsüdang, Argentina atema US-i teyari sen \$40bn agütsütsü aliba ya Milei yimdenren inyakyim nung keta lir ta Trump-i

tejangja shia lir.

Milei bhukumer temi ibaji pela agizük, saka anemer temibo Argentina elections nung Trump ya bendangeri teka amoshiba ka lir ta aitsür.

"Teti asoshi Argentina puti otsü melenshitsü atema asenoki inyaka aruba temelenshi lenmang asenoki tashi itshidaktsütsüla... aser Argentina ano tamaren kumdaktsütsü," ta Milei-i pa bhukumer dang ashi.

Elections magidang par party ya Senate menden tenet dang liasü aser lower house nung menden 37 liasü. Iba yongji senotsü indokba ajemtsü aser temelenshi atema pa indang sentong nung tetsükdaktsü balala ajurua aru.

State universities, matamabensai aliba nüburtem aser tanur indang healthcare nung senotsü teyari tali agütsütsü bill tem pai vetoes asüba ajunga opposition teloki meyiptsü.

Deobarnü iba osang

sangdongba sülen pa bhukumer nisung noklang aika Buenos Aires nung hotel ka kima adenshia tepela ola agüja liasü, kong pa iba osang repranga liasü.

Item elections ya 2023 küm Milei tir akumba sülen linük nung tetendangba mezüngbuba liasü. Pai iba sülen education, pensions, health, infrastructure aser subsidies indang budgets ajemtsü aser public sector nung mapa inyaker nisung meyirijang aika mapa nungi anentsü.

Pai inflation ajemtsüba atema Trump densema pa bhukumer temi tenüngsang agüja liasü - konba küm shia figure asem tonga liasü - sentsü ajema kumdaktsü aser investor temi tanaben temulung ulushidaktsü.

Ajisüaka pa anemer temi iba mera ajanga mapa aika sama, osettsüset yangluba ajema akum, public services mejungi akum, nüburtem dak alitsü tashi samadaktsü ta ashir.

Pakistan Army Chief kümsük atsülangba mechi mangatettep lir

Islamabad, Mongputeni/ Oct. 27 (Agencies): Pakistani Army chief Field Marshal Asim Munir indang kümsük atsülangba mechi GHQ aser Islamabad tsüngta mangatettep tulu adoka lir.

Pakistan sorkari pa indang kümsük 2027 tashi atsülangtsür asünungji sangdong tasen menügdaker ta ashir, saka Field Marshal Asim Munir-i tang nungi tenzüka 2030 tashi küm pongu atsülangdaktsüner.

It dangiter osang kar ajanga ashiba agi, GHQ Rawalpindi aser Islamabad tsüngta tang mangatettep adoka aliba ya kümsük indang kisüng masü. Tang nungi tenzüka küm pongu kümsük tasen meshiba tetetzü Field Marshal Munir yagi Pakistan indang tarutsü 'political cycle' amokbangtsü nükjidong lir,

koba ajanga civilian sorkar ana tashinung mitkar temi tashi amshitsü, ta osangtem ajanga ashi.

PML-N asoshi küm ana atsülangtsüba ya atsü-anem akaba masü saka parnok yimsüsüba menden nung alitsü asoshi tasa ka amai lir ta ashir. Field Marshal Munir indang küm pongu kümsük tang atsülangtsüba ajanga pa anokshitsütsü tamakoktsü akumtsü, kechiaser pai establishment amokbangtsü aser 'political games' asayatsü, ta osang ajanga ashir.

Kasa mapang Field Marshal Munir-i küm pongu tsüngta PML-N ya yimsüsüba mendeni bener arutsü nangzüka lir - koba party-i agizüktsü renema mali. Iba melen parnoki pa nem küm ana agütsütsü aser 2027 nungi

tenzüka küm pongu agütsütsü nangzüker, ta itdangiter osangtem ajanga ashi.

PML-N indang sentong ya 2027 küm Pakistan army tekolakba kümsük atsülangja aliba metembangdang jelia election agitsü tasa lir. Parnok yimsüsüba mendeni atuba sülen parnoki ano pai aginüba ama küm pongu apuloktsütsü.

Field Marshal Munir yagi Qatar densema bendang lima nungi teyari bushir, aser parnoki Shehbaz Sharif den tezüngzüktep ka yanglutsütsü meranger.

Ajisüaka pa indang kümsük ano küm pongu atsülangtsüba nung mitkar temi memulungba mali. Pai lanur generals tem jenjang yanglutsüogo aser top corps commanders kar melentsü sentong lir, ta parnoki ashi.

Gaza-i koba linük sepia yoktsü aji Israel-i lemtettsü: Netanyahu

Jerusalem, Mongputeni/ October 27 (Agencies): Israel Ato Kilonser Benjamin Netanyahu-i Deobarnü ashiba agi, US Tir Donald Trump indang sentong kübok Gaza nung maneni ceasefire benoka inyaksangshitsü atema international sepaitem yoktsü sentong yanglur aliba dak sendakba nung koba linük nungi sepaitem Gaza-i yoktsü aji Israel-i telemtetba agitsü.

Arab aser tanga state temi sepaitem yoktsü mulunger memulunger aji mejangja. Kasa mapang nung Hamas puria ceasefire atema tenangzüktepba yangluba mapang ayongzükbba ama prangbong hadir toktsütsü memulunger aser Israel-ia sepaitem ya koba linük nungisa yoktsü iba indang

tebilemstsü akar.

Trump administration-ibo Gaza Strip-i US nunger sepaitem meyoktsü ta shiogo, saka parnoki Indonesia, United Arab Emirates, Egypt, Qatar, Turkey aser Azerbaijan nunger den sepaitem yoktsü atema jembidar.

"Onok security onoki azüoka lir aser international sepaitem dak sendakba nung koba sepai onoki magizükteter aji Israel-i telemtetba agitsü. Onoki iba amai inyaksangshia aruogo aser maneni inyaksangshitsü," ta Netanyahu-i ashi.

2023 küm October 7 nü Hamas puri Israel amakba sülen Israel-i Gaza ya küm ana tashi sabanga ayu aser tang tashi iba tesemi aoba tesemtem parnoki azüoka lir.

Taoba hopta Netanyahu-i, Gaza nung Turkey nunger sepaitemi shilem agiba pai anemtsü ta shiogo. Turkey aser Israel na tesendaktep junga dang liasü saka Gaza nung rara tenzükbba sülen mejungi kümogo. Turkey Tir Tayyip Erdogan-i, anüng aser ali ajanga Gaza amakba atema Israel aitsüogo.

U.S. Secretary of State Marco Rubio-i Hokolbarnü ashiba agi, International sepaitem ya Israel-i mulungba linüktem nungi asütsüla. Ajisüaka pai Turkey indang kecha mejembi.

Rubio-isa, Gaza yimsü asütsü atema Israel aser partner linüktemi maneni inyakteptsüla saka Hamas purbo medendaktsütsü, ta ashi.

KODANGA MAKONGBA OJALA TAMANG NÜKTZÜ



Ojala Imsangpangla
(30/09/1917 - 28/10/2024)

Temeim Oja,

Anogo aser mapang kara-kara asemjena aor, yamaji nai onok toktsür ne akümlü wadang tembanger küm ka tashi aruaka ne temeim tamang nüktzü onok den kodanga makonger. Asen Teyanglur dang nungi nai mepizüka toktsüba temoatsü ma nung ner chirnur aser semchisemnurtem tesünep nung jaja arudaki.

Maneni ne temeim aser temoatsütem onok den teti alitsü.

Temeim Chirnur aser Semchirtem.

Menungra Bilemteter



ASÜR R. AWALA AIER
ASÜ : 28/10/2024

Onoki teti meima aliba asür R. Awala Aier, na onok nungi pilar küm ka rentetaka oaka nü temeim, aria bilemba aser tepela mulungsentsü onok mulung nung künü danga amadoktsü makoker aser item jagi onok mulung teti ajungshir.

~ Temeim Kinungbo, Chinur aser Semchisemnur.

Mali nung school tem hopta ana atema shibanga atatsü

Bamako, Mongpurteni/ October 27 (Agencies): Mali nung telungpurtemi September ita nungi tanga linük nungi totzü bener aruba tenokdangba agütsüba sülen linük nung totzü agi kanga anünga aliba mapang Mali indang military sorkari linük ajunga nung school aser university tem hopta ana atema shibanga atatsü ta metetdaktsüogo.

Education Minister Amadou Sy Savane-i Deobarnü ashiba agi, totzü supply nung tetsükdaktsü adokba ajanga school staff tem senzüsenpong minpronger aser ibayongji school aser college tem November 9 tashi shibanga atatsüsa kümogo.

Paisa, November 10 nü nungi school metenzükshi tsüngda totzü supply aki ama küm daktsütsü atema takokba tashi inyakdar, ta shisem.

Sahel tesem nung inyaksangshiba Jama'at Nusrat ul-Islam wa al-Muslimin (JNIM) telungpur teloki kidanger linüktem nungi totzü bener marudaktsütsü ta sangdongba sülen ita anashi lir tang iba ya atalokogo.

Iba osang sangdongba sülen al-Qaeda den sendaktepa aliba telok yagi talisa Senegal aser Ivory Coast nungi totzü bener aruba garitem maka arudar.

Mali nunger ketdangsürtemi yim dak yimtsüngtem nung totzü ayokba nokdangba atema iba tenokdangba ya agütsür ta JNIM-i ashi. Yim dak

yimtsüngtem nung totzü ya jerry can tem nung bener oa ayoker. Kasa mapang nung Mali nunger ketdangsürtemi ashiba agi, JNIM indang supply line tem raksatsütsü atema parnoki iba jenjang ya agiogo.

Iba tenokdangba agütsüba ajanga Mali rongsenketzüng mejungi aliba tali tamajungba küm dakja, oset nung jenjang timba akümer aser linük transport dak kanga mejungi kongshioogo

Iba timtem yagi linük yimtiba Bamako daka kongshioogo, kong gas station tem kima nung gari aika anendena alir.

Mali den kidanger Burkina Faso aser Niger nunger kuma aika telungpurtem den raratepa arudar. Item teloktem ya karbo al-Qaeda aser ISIL (ISIS) den sendaktepa lir aser kar local telungpurtem lir.

Taoba küm ishika tsüngda linük asem nung ya military-i sorkar atsüngba sülen yimsüsürtemi France nunger sepaitem mintokogo aser security dak sendakba nung teyari ya Russia indang mercenary unit nung agidar, saka temelenshi kecha balaka mali.

Ken o asadangertemi ashiba agi, iba tenokdangba agütsüba ajanga Mali nung military sorkar kanga akoksadar, shirnoki 2020 küm sorkar atsüngba ya security dak sendakba nung ken o tem bentettsü atema nüngdaka liasü ta shia liasü.

Sechu-Zubza nung Khelo India Football asayamung shibangba sentong agi



Kohima, Mongputeni/October 27 (TYO): Khelo India Football asayamung shibangba sentong Hombarnü WAPO Ground, Sechu-Zubza nung agiogo. Iba asayamung ya Central Reserve Police Force (CRPF) 78 Battalion aser Sports Authority of India (SAI) na longjemer ayongzüka asayaogo.

Khelo India inyakyim kübok sportsmanship, physical fitness ajungketsü aser lanurtem nem shilem agidaktsüsü nükjidong nung iba asayamung ayongzüka asayaogo.

Asayamung shibangba sentong nung Director General of Police, Nagaland Rupin

Sharma, IPS, tongti tejaoker liasü. Sentong nung o jembiba mapang pai, iba asayamung ayongzüka aser discipline, teamwork, aser saisabong tanüla renloka odaktsüsü atema lanurtem ajungmesotsü asoshi maneni jenjang tajung agiba atema CRPF aser SAI na dang kanga pelaba lemsatep.

Saisabong koda tongtibang iba indang jembiba mapang DGP-i, iba ajanga lanurtem aser nüburtet taküm yimya aziüktsü aser anema alitsü atema jenjang agitsü ajungmesor ta ashi. Paisa, Khelo India inyakyim kübok Nagaland nung dang masü saka Manipur densema Northeast kübok state balala

nung iba amala asayamung ayongzüka asayaba atema CRPF nem tenüangsang agütsü.

"CRPF-i inyakyim kanga tajung benoka inyaker," ta pai ashi.

Maneni Sharma-i, tarutsü nung iba amala asayamung ayongzüka asayatsü atema Nagaland Police nem tashi agütsüsü asoshi CRPF den longjemer inyaktsü tebilemba aliba lemsatepa liasü. Saisabong ajanga nüburtet den sendakteptsü koda tongtibang iba indang jembiba mapang pai, küm pezü shi lir Nagaland Police recruitment tenzükogo ta shia pai lanurtem aser talisa asayartem dang police nung

mapa atema apply asütsü ajungshia liasü.

"Nagaland Police nung aiür aser asangur chanutem aser talisa asayartem anioktsü atema onok yongya atadar. Iba ya asaya nung nenok tejangraba maneni inyakyonga aotsü atema dang masü, saka tarutsü asoshi jenjang yanglutsü atema maongka tajung ka lir," ta pai ashi.

Recruitment inyakyim indang rasa ashiba mapang pai, physical test atema mark 45 aser written tatidang atema marks 40 asütsü aser iba ajanga shitemang anema tashi ita alirtem aser asayartem atema maongka talila ka agütsür, ta

ashi. "Na asayar ka süra tatidang ajangettsü timla lir. Yimlibilema apply süang," ta pai ashi.

Maneni DGP-i, iba asayamung ayongzüka asayatsü atema teyari agütsüba atema Modern College aser Don Bosco School na dang pelaba lemsatep aser CRPF officer aser personnel tem nema asayamung takok ngua ayongzüka atema tenüangsang agüja liasü.

Final asaya nung Phesama Students' Union (PSU)-i goal 1-0 agi Khonoma Students' Union (KSU) koka taküm parnoki iba asayamung kokogo.

Jurila sempet angurtem: Player of the Tournament: Mezgülhoulie Zashümo (PSU); Best Goalkeeper: Vikehiekhö Seleyi (PSU); Highest Scorers: Neiphivilie Seyie (PSU) aser Mezgülhoulie Zashümo.

Asayamung akokba team nem sen 15,000 den kuli kakat agütsü aser runner-up team nem senpet sen 10,000 agüja liasü. Jurila sempet agizükertem nem kuli kakat den senpet sen 1000 agüja liasü.

Sentong ya DGP Nagaland-i sempet lemtsüba aser tepela o jembiba den asayartem aser tejaokertem tsüngda sensaksemba sülen tembanga liasü.

Sen-i anir India nunger asayartem Hylo Open asayatsü



Mongputeni/October 27, 2025 (Agencies):

Mongolbarnü nungi tenzüka India nunger badminton asayar tejen aser tasentem aika USD 475,000 Hylo Open Super 500 asayamung nung asayatsü lir. Iba asayamung ya Saarbrücken (Germany) nung asayatsü.

Tebur kija asaya nung 2021 World Championships bronze medallist Lakshya Sen, shibai tawa Hong Kong Open final tonga asayaogo, pa mezüngbuba round nung fifth seed France nunger Christo Popov den asayatsü aser US Open champion Ayush Shetty

Denmark nunger asayar Victor Lai den asayatsü.

Taoba mapang world No.1 asayar Kidambi Srikanth, shibai taküm küm tetenzüklen Malaysia Masters final tonga asayaogo, pa külem India nunger asayar Kiran George den asayatsü aser S Sankar Muthusamy Subramanian, Malaysia nunger asayar Leong Jun Hao denn asayatsü. Ano Macau Open Super 300 semifinalist Tharun Manneppalli, Indonesia nunger second seed asayar Jonatan Christie den asayatsü.

Tetsür kija asaya nung

Anmol Kharb, shibai iba ita tetenzüklen Arctic Open Super 500 semifinal tonga asayaogo, la Denmark tsür Julie Dawall Jakobsen den asayatsü aser Unnati Hooda Brazil tsür Juliana Viana Vieira den asayatsü.

Tetsür kija asaya nungsa Anupama Upadhyaya, Ukraine tsür Polina Buhrova den asayatsü aser Rakshitha Sree Santhosh Ramraj Spain tsür Clara Azurmendi den asayatsü. Shriyanshi Valishetty shibai iba ita tetenzüklen Al Ain Masters Super 100 title benogo, la Denmark tsür third seed Line Højmark Kjaersfeldt den asayatsü.

Maneni Aakarshi Kashyap Turkey tsür Neslihan Arin, aser Tanya Hemanth fourth seed Chinese Taipei tsür Lin Hsiang Ti den asayatsü.

Tebur tarep asaya nung Pruthvi Krishnamurthy Roy aser Sai Pratheek K na mezüngbuba round nung France nunger tarep Christo aser Toma Junior Popov na den asayatsü.

Tarep temeyoktep asaya nung Rohan Kapoor aser Ruthvika Shivani Gadde na Canada nunger tarep Jonathan Bing Tsan Lai aser Crystal Lai na den asayatsü.

Juventus-i coach Igor Tudor mapa nungi anentsüogo

Mongputeni/October 27, 2025 (Agencies): Serie A nung Juventus pur season tasenba junga masayateti arudar aser Deobarnü Lazio goal ka agi makokba sülen parnoki head coach Igor Tudor mapa nungi anentsüogo.

Iba asaya makokba sülen Juventus puri Serie A nung taoba asaya pongu nung point pongu dang nguteta lir. Maneni Deobarnü Lazio makokba ya tetoktepba ajak nung parnok asaya asembuba atonga tamakok anguba liasü.

Croatia nunger coach ya Thiago Motta melena iba Italy nunger club nung ya March ita dena liasü.

Ajisüaka arishi küm 43 tain coach lenisüba nung par team asaya ti tashi khen danga takok mongui asaya aser iba ajanga parnok Serie A table nung tang tibuba nung lir.

Club-i official sangdong ka ajanga Massimiliano Brambilla, shiba tang tebur first team in charge lir pai interim basis nung coach mapa bena atatsü aser pa lenisüba

nung Juvi pur Bodhbarnü Udinese den asayatsü, ta metetdaktsüogo.

"Juventus FC-i, tebur first team head coach Igor Tudor den pa indang staff Ivan Javorcic, Tomislav Rogic aser Riccardo Ragnacci nunger tanü nungi tenzüka mapa nungi anentsüba metetdaktsür," ta club sangdong ajanga metetdaktsü.

"Club-i Igor Tudor aser par staff tem dang parnoki taoba ita ishika tsüngda bendanga agüja inyakba aser parnok professionalism atema pelaba lemsateper aser parnok tarutsü takok nung aotsü imlaja atar," ta kasa sangdong ajangsa metetdaktsü.

Juventus pur tang Serie A nung temaba jenjang nung aliba Napoli team dang nungi point trok agi tajemba lir. Champions League nunga parnoki junga masayateti arudar aser team 36 nungi parnok 25buba nung lir. Parnoki Champions League nung asaya asem asayaba sülen point ka dang nguteta lir.

BILEMDANGANG

"Na sentong kecha melira tangar sentong nung shilem ka akümtsü."